

MMDLV.

Le prince d'Orange à la reine d'Angleterre.

(DELFT, 17 MARS 1573.)

Achat de blé et de poudre.

Madame, Comme pour les grans frais et despens que les habitans de Flussinge et de la Vere portent journallement pour la deffence du païs de Walcheren contre les hostilités du Duc d'Alve et de ses adhérens, ils se retreuvent en queleque courtresse de bleds et aussy de pouldres, et qu'à ce regard, pour en faire provision pour au besoing ne s'en trouver en faulte et par là demeurer en peine, ils sont délibérés d'achapter queleques cinquante ou soixante lasts de bleds et queleque pouldres au royaulme de Vostre Majesté, j'ay prins la hardiesse de luy faire ce mot de lettre en leur faveur seulement pour supplier Vostre Majesté bien humblement qu'à vostre accoustumée bénignité et élémence il plaise à Vostre Majesté [octroyer] qu'ils pourront les bleds et pouldres par eulx ou leurs députés achaptés en Angleterre mener hors vostre dict royaulme vers le païs de Walcheren à l'effect que dessus, et à cela leur accorder telles seuretés qu'ils auront besoing : ce en considération du vray zèle que lesdicts de Walcheren ont à l'avancement de la cause chrestienne et commune. Et se peult Vostre Majesté asseurer que ceulx dudict Walcheren et moy demeurerons éternellement obligés à Vostre Majesté et prions Dieu pour la très-heureuse prospérité de Vostre Majesté, comme aussy moy en particulier ne manqueray de meetre ma vie en hazard en tous lieux quant le service de Vostre Majesté le requerra.

Madame, baisant très-humblement les mains de Vostre Majesté, je supplie le Créateur Éternel vous faire à tousjours prospérer au comble de tous les nobles désirs de Vostre Majesté.

Escript à Delft, ce xvij^e jour de mars 1573.

(Record office, Cal., n° 829.)